

晚晴簃詩匯

第八册

晚晴移詩匯卷十七目錄

李鄴嗣

三十五首

談遷

七首

彭孫貽

十五首

應撝謙

一首

潘問奇

七首

沈謙

八首

俞鼎

八首

周箕

十首

呂師濂

十二首

陳洪綬

十七首

劉洵

一首

俞得鯉

二首

蕭中素

六首

馮元仲

三首

晚晴移詩匯卷十七

徐世昌

李鄴嗣原名文胤以字行號杲堂鄞縣人明諸生有杲

堂詩鈔

全謝山曰康熙戊午浙之大吏欲以先生應詞科之
薦以死力辭已而萬徵君季野亦有史館之招先生
送之歎曰鄭次都能招致君章同隱弋陽山中
不能禁其喟然而別徵君後以是終不受史職
詩話杲堂年十二三能詩即有秀句十六補諸生父
桐嘗被逮杭州獄杲堂亦繫定海馬廐中七十日父
喪自杭歸一慟幾絕再下府獄得免著漢語南朝續
世說輯甬上耆舊詩徧爲作傳藉存文獻其詩別才
逸腕刻刻異人黃梨洲稱其胸中流出無比擬皮毛
之習蓋破除王李鍾譚之窠臼而毅然自爲者也

行路難

步出浙江干酸風射華髮曾此鬪戈船隔岸西陵飲馬窟
窄行礙履齒莫是當年死士骨銅腥漬草草不長鬼作戰

聲猶恍忽君不見蛟龍夜徙田橫島海潮不到江潮小
客程當落日重經古陵傍陵柏摧爲薪百里爨室香石人
枕石馬魚鐙闇失光熊羆旣不守穴狐起相商自昔帝王
終失勢土花滴盡行人淚獵人獲得大鹿歸角下小脾隱
有字摩挲知寫放鹿年誰識漢陵當日事

颶風吹散陰天霧十里橫塘開石路云是當年捍海隄黃
土茫茫海眼涸隄上人家學種桑老翁不識靈胥怒發鳩
怨鳥暫得伸草沒鮫宮烽火樹麻姑笑語王方平水淺蓬
萊復一度人間海陸亦易遷天地鴻濛我適晤

秋懷

我心悲四序秋天不可長登高莽難辨中原亦奔茫長跪
復西嚮諸陵黯蒼蒼束髮讀六經豈知早投荒夜中迴月

御若木應可望裴回入空巷旅穀擷滿筐憶此句踐國霸
氣久未央曾聞采葛婦悲吟奉吾王薄脯臨浙水君臣淚
盈裳

亂楓裹江浦遺叟步拾秋往事不可訴欲語生百憂河山
倏破碎耄眼識其繇有雲來滄浥視我同悠悠千春石頭
水斷鎖失中流江南仗王謝乃與鼠輩謀遙傳故常侍遺
孽亂神州舊京猶未覆士氣鬱已囚藉卉今何所六朝襍
松楸潛行未敢哭日腳柴門收

南登白雲山巨壘萬年在老藤緣若梁蒼虬俯承蓋崩剝
傍壑深日渴陷其內我行已及巔得與飛鳥會憶自伏蓬
茨三年漸短喙嚙雪猶未乾蒼茫喪蘭佩豈意躋危巖復
窺天地大延頸始一歌林木助幽籟雲黑古西陵東望哭

再拜朱囑暮歸來迢迢關水外

山樓

日夕坐眾山空嵐不知溼太白峙我前鹿巖別疏立輕雲
時往還兩山始郵接秋光無定容俯仰每不及歛然隨飛
鳥林煙各小集寒碧散空郊靜久同吐噏十里候樵蘇殘
曛未全入

山行失道

出烏石山後擬上長岡偶失道落叢棘中
竹葉刺眉路隙不縷同游者閉目偃行三

里始出

習僻厭平阡歧道入榛莽竿足不肯回牽拂堅初往稍進
益無天竹葉大踰掌隙處觸瓣雲日腳不落壤視體若匿
松漸偃安得仰兩袖競翅張冒棘先用顙導者未識誰後
趾蹴前繃人獸盡無音但聞碎籜響三里幸出叢目光久

瞻睓始見樵子行訝我反山魍

得杖

出叢棘後各選石雜坐土人俟余輩色定氣定因采竹爲杖各贈一莖乃得進

旣出賀險盡瞻前乃復斛小憇對古松支離類此叟策足
恥言疲終落僕夫後山人指爪強拗竹等拗荏憐余進一
莖茲意感君厚忽若當顛危倚身得奇友山魍不敢爭空
潭戰蚴蟉翼足若漸輕影逐孤雲走大謂二子云騰嶽等
培塿

自大嵩嶺上二十里至福泉精舍作

捨舟上樵徑晴眺分纖毫循塗凡屢盤獲奇隨所遭崩崖
露雲根長風勢漸饗諸巒徐束體始識身已高過雨忽足
下髮上天氣交在輿尙苦疲何況昇者勞首虐乘人車筋
力嗟爾曹斗上復稍垂豁然闢林坳老松得成鱗巖土抽

春毛梵僧構幽棲人龍同一巢入門氣得蘇豆筍羅山庖
到此慚浮名徒爲猿鳥嘲我何不徑然將家住藤梢

登望海絕頂

天風吹客上斷竹翼我身廓然老目開得見天地新大海
瀚其前萬象趨嘉門亂嶽業相持黃牛三寸蹲太空積終
古一氣還渾淪日車晝夜轉爛爛推星辰長江飄素帶巨
湖注盈盆衆川盡小心東流奉至尊卻望三神山縹緲失
金銀欲把東皇衣垂顙拂小臣陽烏忽以墮朱鳥來紛紛
安得千巫咸一一招古魂同臨睇髮叟灑涕送奇文尺五
天下語地上應不聞

慰公夜聽老僧說大龍湫余爲述其語

兩山劈相對體凹而頭出怒勢角終古欲磕僅不磕飛瀑

自頂來懸噴下離壁驚颺忽吹過左搏或右結急裊萬弗
珠疾圍千捧雪立下觸暫巖一跌撲再跌迴颺忽吹轉團
物上未擘磻石復一響片片始飄屑風伯大奔忙雷君喊
無歇百靈不暫停混沌至今日慰公適語我夜同老僧榻
聽說大龍湫驚起喚奇絕恍若置此中狂叫蕩魂魄足仄
不得收目瞬不計睫始歎世外奇天地偶一設老僧旣善
狀得過慰公舌慰公旣善談得入杲叟筆山神最遙待高
僧與詞伯請更說匡廬泉聲落三疊

胥潮行

八月高颺天上來胥江疊浪如山堆伍相揚威不可觸秦
皇當渡空徘徊雷驅雪擁洪濤起北赭南龕愁對峙白馬
疑奔練影中素車隱動鞞聲裏鴟夷之器未飄風屬鏤之

鉉尙吐虹野廩纔入夫差苑蔓草旋生句踐宮吳亡越霸
斯須度獨有靈胥難霽怒湧勢常愁地軸翻傾波若向天
關注胥江濤險有如此不煩鐵鎖沉江底飲馬誰教水伯
逋控弦誰使陽侯徙吁嗟乎巨壑填盈精衛石朝可枯潮
夕枯沙蘭亭夜抱冬青枝纍纍之涕不可絕

杜鵑行

春風漫漫百草綠登臺獨展傷春目惜別初彈蜀國弦懷
歸再理巫山曲巫山迢遙隔萬里怨鳥一聲空裂耳但知
今日鼃靈尊還念當時舊天子蠶叢之國闢何年魚鳧城
郭隨飄煙赤樓嵯峨不可見碧雞金雁俱茫然故國興衰
不復數中夜號呼亦何補北嚮猶哀灑血多倒懸更訴髡
毛苦世間代謝須臾事漢寢唐陵盡何處鴻雁終依歲往

來山川難促人歸去江頭細鳥抑何仁千年禮節尙人臣
願採琅玕飼天種阿閣爲巢以奉君

久客歸

客行二十年記老不識少改盡故鬚眉昨夜邊塲到憶昔
城東開萬戶城口浮梁接江潁出關收魚若收租大船半
泊新安估廟前市馬金障泥古渡桃花鬪眉顰今來陵谷
何易遷夾路小坊盡草莽獨行空巷白日疑放悲西鄰一
寡姥黃門甲第當衢開老兵橫卧自稱主郭外古墳有我
親白楊樹倒供斤斧久客無家還欲行兒骨先愁不傍父
飄葉終身思本根及到誰知益酸苦幾時眞得洗甲兵盡
使流人歸舊土

死戍墓歌爲給事姜貞毅先生作

思陵望治苦若渴側席重宣故相出二十四氣誣正人首
持魁柄障白日萊陽姜公在黃門平生忠篤感至尊極論
丞相真有力要使言官氣得伸上怒赫然死不重卻念直
臣心稍動且將赤棒代歐刀生謫不投人鮓甕聖朝從諫
本如流坐看雷砰電射收天威朝逐陳子壯皇恩夕召
黃道周臣琛哭辭闕下出數到宣城四十日忽傳龍御遂
升天環未及還玦未決小臣目斷燕雲下自操吳戈甲不
卸人間今已絕金雞待到黃壚方遇赦勞勞內史啼南陌
鸚鵡催歸歸不得舊館惟尋皋伯通殘命仍投閭子直三
十年來淚無數白髮青山同旦暮遺骸只葬敬亭坵萬古
漢臣死戌墓君不見先皇仗劍排闥闔臣挾秦弓侍其側
東臺給事生上書宣州老兵死殺賊念祖堂前異草生青

松壟上秋燐碧請取孤臣不死心寫向嵌巖一片碣

贈語溪曹黃門歌

記葬場侍御事也

銅人淚滴茅人瞰漢皇寢殿罽陷杜陵狼藉虎文衣秋
風劉郎看磨劍趙家冤湊一塔餅天陰啼襍馬牛聲不道
一邱蘭上土有人月黑抱冬青此時鬼伯兇如此日逼諸
君上蒿里只從野外哭忠魂誰識路旁流義髓義髓凝爲
千載碧山鵲照眼泉鳴咽家家骨煖一壘泥幾叢亂稊無
寒食語溪黃門義丈夫肯將十匱覆黃壚樹上只容栖怨
鳥田間不敢走妖狐墓石官階都不記小碑只篆嗚呼字
碑前劍草發今春何人下馬雙垂淚安得燒甌千萬堆盡
掩人間義士骸萬盂麥粥千竿紙土花開徧鬪體臺神旗
颯颯飄如雨夜中聽喚諸公語深蒙范式挽靈車多謝張

融著高履

夜望

秋氣生華漢蕭然獨望身
天空雲逐鳥夜永月依人
草木冰霜近關河烽燧頻
那堪照衰鬢涕淚共時新

平生

平生忼慨淚秋雨一尊多
島上悲龍笛江東老鷺竿
流歲月短髮送山河野眺
蒼茫候何人起浩歌

眾中

眾中常默默自覺不能親
草木增新涕江山厭舊人
名宜隨世變詩尙觸時嗔
還憩空牀坐低回此日身

懷祈永

到處雞聲促奇人南北身
變名吳市客結友灞陵人
舊室

青萍氣荒祠黃石神乾坤方帶甲執手幾時眞

出門望友

亦知來未定束帶候柴門袖置經年字心懷越陌恩
孤煙初白港楓火漸紅村過盡南飛雁離思不可論

丁巳長夏得鄧孝威寄詩卽韻奉答

賀監祠堂下君來酬唱多野花紅照路春水綠生波
鼓角遺民聚江山名士過無言此會易千載聽悲歌

與君同避世老眼閱桑田灑淚登臺日編書閉閣年
花詢蘭里發月憶鑑湖圓可得還江上來尋詠史船

奉答嘯堂和尙

煨藥三春裏誰知巷草生衰年慙廢學近俗畏知名
杖履憑高置鸞花養老成故人誰問疾斟酌啟柴荆

憑高

幾處空城畫角催憑高暮色暫相開江流不斷龍雷動日
落斜臨墀堦來短髮三秋常望氣故人千里共登臺千戈
已隔霜前信高柳頻年雁未迴

哭履安先生

南國香蘭不復生人間難死是高名嗚呼表墓長留字慟
哭登臺未絕聲寒起干楓飄白髮悲摩一鳥下蒼冥論交
此日誰無恙舊笛音中天地冰

友人搜錄東沙公遺集感而賦詩

麥粥吞聲對夕曛重披遺草坐宵分苦吟一誦睢陽作正
議初傳丞相文片字藉公爭杲日九章得汝播靈芬千春
大義應同識此際交情總讓君